

# **PEMIKIRAN AHL AL-SUNNAH WA AL-JAMAAH PERLIS**

oleh  
**Zakaria @ Mahmud bin Daud**

## **Abstract**

*This articles tries to discuss the views of Ahl al-Sunnah Wa al-Jammah in Perlis which are looks difference between the views of Ahl al-Sunnah Wa al-Jama'ah in the other counties in Malaysia*

## **Pendahuluan**

Pada umumnya pemikiran Ahl al-Sunnah Wa al-Jama'ah Perlis sama seperti pemikiran masyarakat Melayu Islam lain di Malaysia, kecuali penekanan dan tumpuan mereka yang lebih dan berbeza pada beberapa perkara tertentu. Contohnya mereka dikatakan mahu kembali kepada al-Quran dan al-Sunnah dan tidak bertaklid kepada sesuatu mazhab tertentu. Mereka juga menolak perkara-perkara bid'ah dan khurafat dan memberi penumpuan kepada tauhid aliran *salafiyah*, serta mengamalkan cara sembahyang berpandukan hadith Rasulullah s.a.w. Mereka menolak amalan talkin orang mati, tunggu kubur, kenduri arwah, tahlil dan lain-lain lagi.

Di bawah ini dijelaskan beberapa aspek pemikiran mereka yang tersebut di atas secara lebih detail supaya ianya dapat diketahui sejauhmana adanya perbezaan dengan apa yang dilakukan oleh golongan lain khususnya yang bermazhab Syafie.

### **a. Kembali Kepada Al-Quran dan Sunnah**

Mengikut tokoh-tokoh Ahl al-Sunnah Perlis mereka menyatakan bahawa seruan untuk kembali kepada al-Quran dan Sunnah adalah satu agenda yang terpenting dalam gerakan mereka, bahkan ia merupakan satu slogan yang selalu digunakan dan disebut-sebut. Kedua-dua perkara ini juga menjadi dasar Persatuan Islah Perlis.<sup>1</sup>

---

<sup>1</sup>Perlembagaan Persatuan al-Islah Perlis, t.t., hlm. 1. Persatuan ini ditubuhkan untuk membela Ahl al-Sunnah Wa al-Jama'ah di sana. Ia ditubuh secara rasmi pada 18 Mac 1965.

Ustaz Othman bin Muhammad salah seorang tokoh Ahl al-Sunnah Perlis sewaktu membentang kertas kerjanya pada tahun 1988 menjelaskan sikap Ahl al-Sunnah Wa al-Jama'ah Perlis terhadap al-Quran dan Sunnah. Katanya:

*"Ahl al-Sunnah Wa al-Jama'ah ialah satu kumpulan atau golongan yang berpegang kepada ajaran al-Quran dan Sunnah seperitimana amalan yang dilakukan oleh para sahabat dan tabien tanpa melakukan bid'ah."*<sup>2</sup>

Dalam pentadbiran Undang-undang Agama Islam dan Adat Istiadat Melayu Perlis tahun 1964 perkara 7(4). Bab Fatwa, memperuntukan fasal supaya majlis fatwa apabila ingin mengeluarkan fatwa mestilah dirujuk kepada al-Quran dan sunnah Rasulullah, bukan kepada pendapat imam-imam mazhab yang ada. Peruntukan ini menyebut:

*"Tatkala majlis mengeluarkan satu fatwa dan jawatankuasa Syariah memberi pendapatnya di bawah ceraian (2), maka hendaklah badan itu mengikut al-Quran dan Sunnah Rasulullah."*<sup>3</sup>

Selain itu sewaktu menjelaskan maksud Ahl al-Sunnah Wa al-Jama'ah Perlis, undang-undang tubuh menyebut, "Mereka ialah golongan yang berpegang kepada al-Quran, sunnah Rasulullah dan pendapat para sahabat."<sup>4</sup>

Sikap mereka sedemikian itu dianggap baik kerana al-Qur'an dan al-Sunnah merupakan sumber hukum utama dalam Islam. Umat Islam tidak mempunyai pilihan lain untuk menghayati ajaran Islam yang sebenar melainkan mesti kembali kepada kedua-dua sumber asli itu terlebih dahulu sebelum mengambil sumber yang lain. Rasulullah s.a.w. bersabda, maksudnya:<sup>5</sup>

*"Aku tinggal pada kamu dua perkara, kamu tidak akan sesat selama-lamanya selagi kamu berpegang kepada kedua-duanya iaitu kitab Allah (al-Quran) dan sunnah RasulNya."*

Hadith di atas menunjukkan bahawa ajaran yang ditinggalkan oleh Nabi kita Muhammad s.a.w. yang boleh dijadikan pedoman hidup hanya dua perkara iaitu

<sup>2</sup>Ustaz Othman bin Muhammad, *Konsep Ahli Sunnah wal-Jamaah*, Kertas Kerja dibentang dalam Kursus Pegawai-pegawai Majlis Negeri Perlis, 1988, hlm. 4.

<sup>3</sup>Undang-undang Pentadbiran Agama Islam dan Adat Istiadat Melayu Perlis, 1964, hlm. 5.

<sup>4</sup>Majlis Agama Islam dan Adat Istiadat Melayu Perlis, Keputusan Fatwa mengenai Ahl al-Sunnah Wa al-Jama'ah, hlm. 1.

<sup>5</sup>Ibn al-Athir al-Jazari, *Jami' al-Usul fi Ahadith al-Rasul*, Matbalah al-Malah, 1969M -1398H, jid. 1, hlm. 277.

al-Quran dan al-Hadith. Jika kedua-duanya dipegang dengan teguh dan dijadikan sumber utama oleh setiap umat Islam, mereka tidak akan sesat dari jalan yang benar dan lurus buat selama-lamanya.

Walaupun Ahl al-Sunnah Perlis memberi tumpuan ke arah kembali kepada al-Quran dan al-sunnah tetapi apa yang penulis nampak, tumpuan yang mereka lakukan tidak menyeluruh kepada semua aspek kehidupan mereka. Bahkan mereka banyak mengutamakan di dalam beberapa bidang tertentu sahaja, khususnya mengenai perkara ibadat seperti cara mengambil wuduk, menunaikan sembahyang lima waktu, cara membaca wirid selepas sembahyang, cara menunaikan sembahyang Jumaat, perkara mengenai urusan jenazah, termasuk tidak ada talkin, tahlil, kenduri arwah, tunggu kubur, larangan membina binaan di atas kubur dan seumpamanya. Selain daripada itu, semasa diadakan majlis perkahwinan, mereka tidak mengadakan upacara persandingan atau naik pelamin, menyuarap nasi semangat, merinjis tepung tawar kepada kedua-dua mempelai, tidak seperti yang biasa dilakukan di tempat-tempat lain di seluruh Malaysia. Mengenai perkara-perkara yang disebut di atas kita nampak golongan Ahl al-Sunnah Perlis menghayati panduan ajaran al-Quran dan al-Sunnah Rasulullah s.a.w. Manakala dalam penghayatan Islam yang sebenar secara menyeluruh iaitu dalam bidang-bidang yang lebih luas seperti bidang sosial, ekonomi dan lain-lain lagi, ianya masih boleh dipertikaikan.<sup>6</sup>

### b. Menolak Taklid Kepada Mazhab

Oleh kerana Ahl al-Sunnah Wa al-Jama'ah Pelis mengajak kepada berpegang kepada al-Quran dan al-Sunnah, mereka menolak *bertaklid* kepada mana-mana mazhab Fekah walaupun mazhab itu mazhab Ahl al-Sunnah Wa al-Jama'ah seperti mazhab Syafie yang menjadi ikutan ramai umat Islam di Malaysia, atau mazhab Maliki, Hanafi dan Hanbali. Walau bagaimanapun, mereka tetap *berittiba'* kepada mana-mana pendapat imam mazhab empat yang disokong oleh dalil-dalil yang kuat.<sup>7</sup>

Bagi mereka walaupun pada lahirnya kedua-dua perkataan *taklid* dan *ittiba'* bermakna "mengikut", tetapi pada hakikatnya kedua-dua perkataan itu mempunyai perbezaan yang jelas. *Taklid* bererti mengikut pendapat seseorang tanpa pengetahuan dan bukti, bahkan sebagai pak turut semata-mata seperti mengikut datuk nenek moyang tanpa hujjah atau mengikut sesuatu pendapat tanpa

<sup>6</sup>Dari pengamatan penulis sewaktu membuat kajian pada 4.5.1995 dan awal bulan Mei 1996 yang lepas.

<sup>7</sup>Ahmad Yusof Amin, *Taklid dan Kesan-kesannya Terhadap Perkembangan Fikiran dan Ilmu Pengetahuan*, t.t., hlm. 22.

ilmu. Ini dikatakan *taklid* buta,<sup>8</sup> sepetimana kaum Nabi Ibrahim bertaklid kepada datuk nenek mereka yang menyembah berhala sepetimana yang telah dijelaskan oleh Allah dalam firmanNya:<sup>9</sup>

إِذْ قَالَ لِأَبِيهِ وَقَوْمِهِ مَا هَذِهِ الْتَّمَاثِيلُ الَّتِي أَنْشَرْتُ لَهَا عَنِّكُفُونَ ﴿٦﴾ قَالُوا وَجَدْنَاهَا مِنْ آبَاءِنَا  
لَهَا عَيْدِينَ ﴿٧﴾

“(Ingatlah) ketika Ibrahim berkata kepada bapa dan kaumnya: Patung apakah ini yang kamu tekun beribadat kepadanya?” Mereka menjawab: “Kami dapat datuk nenek kami menyembahnya.”

Manakala *ittiba'* mengikut mereka, digunakan bagi dua makna, pertama mengikut apa yang diturunkan oleh Allah S.W.T melalui wahyu kepada Nabi Muhammad s.a.w. Keduanya, mengikut suruhan Rasulullah s.a.w. Atau dengan kata lain *ittiba'* ialah mengikut pendapat seseorang yang disertakan dengan dalil yang kuat samada dari ayat al-Quran, sunnah Nabi atau sunnah sahabat.<sup>10</sup>

Bagi menguatkan pendapat di atas, Ustaz Ahmad Yusuf Amin memetik pendapat Abu Abdullah Ibn Khawas Mandad al-Basri al-Maliki tentang perbezaan antara *taklid* dan *ittiba'*. Abu Abdullah menyebut:

“Sesiapa yang kamu ikuti kata-katanya tanpa kamu mempastikan ada dalil menyokongnya, maka kamu adalah orang yang bertaklid kepadanya, sedangkan bertaklid di dalam agama Allah tidak sah (tidak boleh). Dan sesiapa yang kamu pastikan ada dalil bagi kamu untuk mengikut pendapatnya, maka kamu adalah *ittiba'*nya atau mengikutnya, sedangkan *ittiba'* dalam agama adalah diterima (dibolehkan) manakala *taklid* ditegah.”<sup>11</sup>

Dari petikan pendapat Abu Abdullah al-Basri al-Maliki di atas jelas menunjukkan bahawa sesiapa yang mengikut seseorang secara *taklid* adalah ditegah oleh Islam. Adapun *ittiba'*, ianya memang disuruh dan dibolehkan. Jadi bertaklid kepada seseorang tertentu pada anggapan Ahl al-Sunnah Wa al-Jama'ah Perlis adalah ditegah walaupun mazhab itu mazhab Ahl al-Sunnah Wa al-Jama'ah seperti mazhab Hanafi, Syafie, Hanbali dan Maliki.

<sup>8</sup>Ibid., hlm. 23-24. Dr. Wahbah al-Zuhayly, *Usul al-Fiqh al-Islami*, Dar al-Fikr, Damsyik, 1986M-1406H., cet. 1, jid. 2, hlm. 1120.

<sup>9</sup>Surah al-Anbiya', ayat 52-53.

<sup>10</sup>Ahmad Yusof Amin, *op.cit.*, hlm. 22.

<sup>11</sup>Ahmad Yusof Amin, *op.cit.*, hlm. 25.

Tokoh mereka ada menyebut bahawa imam-imam mazhab empat tidak pernah menyuruh murid-muridnya supaya *bertaklid* mereka, bahkan imam-imam tersebut menegah murid-muridnya berbuat demikian apabila pendapatnya bercanggah dengan nas al-Quran dan sunnah Nabi yang sahih.

Ustaz Othman bin Muhammad, dalam kertas kerja yang disebut di atas menyebut perkara itu, katanya:

*"Kita ketahui bahawa keempat-empat imam mazhab tidak terkeluar daripada pegangan Ahli Sunnah wal-Jama'ah iaitu berpegang kepada al-Quran dan Sunnah. Kalau sekiranya berpegang kepada mazhab itu wajib, tentulah imam-imam mazhab sendiri berpegang kepada pendapat guru mereka, kerana Imam Syafie berguru dengan Imam Syaibani, murid Imam Abu Hanifah dan Imam Syafie juga berguru dengan Imam Malik. Begitu juga Imam Ahmad Ibn Hanbal berguru dengan Imam Syafie. Jadi berpegang kepada sesuatu mazhab itu bukanlah wajib bahkan tidak boleh berbuat demikian."*<sup>12</sup>

Perlu dijelaskan di sini bahawa walaupun mereka menolak *taklid* kepada mana-mana mazhab ini bukanlah bererti mereka memandang rendah pendapat imam-imam mazhab atau memperkecil-kecilkan mereka. Ahl al-Sunnah Wa al-Jama'ah Perlis tetap menghormati imam-imam mazhab dan menyanjung pendapat serta menerima mereka, cuma mereka tidak terikat dan *bertaklid* kepada pendapat imam-imam tersebut kecuali apabila pendapat itu disertakan dengan dalil yang kuat. Sebab itu dalam buku "Keputusan Fatwa Mengenai Ahl al-Sunnah Wa al-Jama'ah wal-Jamaah", mereka memberi pengiktirafan kepada keempat-empat mazhab Ahl al-Sunnah Wa al-Jama'ah. Buku itu menyebut:

*"Majlis (Agama Islam) tidak terikat dengan mana-mana mazhab tertentu. Di dalam mazhab manapun yang jelas dan nyata pendapat mereka itu (diambil) dari kitab Allah atau sunnah RasulNya atau (dari) jemaah sahabat Rasulullah s.a.w., maka Majlis sedia menerima dan beramal dengannya. Adapun mazhab-mazhab seperti Hanafi, Maliki, Syafie dan Hanbali pada pandangan rasmi Majlis adalah terhitung dalam mazhab-mazhab yang muktabar yang tergolong dalam istilah Ahli Sunnah wal-Jama'ah. Majlis Islam Perlis memang berpandu kepada mazhab-mazhab itu dan mengambil pendapat-pendapat mereka yang ada*

---

<sup>12</sup>Ustaz Othman bin Muhammad, *op.cit.*, hlm. 4.

*alasan dari al-Quran, sunnah dan jemaah sahabat Rasulullah s.a.w..*<sup>13</sup>

Dari petikan di atas, jelas menunjukkan bahawa Ahl al-Sunnah Perlis mengaku berpegang kepada al-Quran dan al-Sunnah Rasulullah s.a.w. serta Sunnah para sahabat. Mereka tidak terikat atau *bertaklid* kepada mana-mana mazhab lebih-lebih lagi semasa mengeluarkan fatwa. Walaupun begitu mereka menganggap mazhab empat tersebut adalah dari golongan ulama Ahl al-Sunnah Wa al-Jama'ah, Lantaran itu, mereka mengambil mana-mana pendapat imam mazhab tersebut yang berdasarkan kepada dalil al-Quran dan al-Sunnah.

Sikap Ahl al-Sunnah Perlis sedemikian rupa yang kemudiannya ditambah atau diperkuatkan pula dengan peruntukan dalam Undang-undang Tubuh Negeri Perlis menyebabkan pendapat mereka berbeza sekali dengan pendapat penduduk Islam di negeri-negeri lain di Semenanjung Malaysia yang menjadikan mazhab Syafie sebagai rujukan utama mengenai hukum syarak.

Bagi menguatkan hujjah-hujjah mereka, tokoh-tokoh Ahl al-Sunnah Perlis menyebut bahawa imam-imam mazhab empat sendiri melarang keras pengikut-pengikutnya dari *bertaklid* kepada mereka. Mereka juga mencela sesiapa yang mengambil pendapat mereka tanpa melihat kepada hujjah dan dalil-dalil yang dikemukakan.

Ustaz Ahmad Yusof Amin memetik pendapat beberapa orang imam mazhab yang melarang *bertaklid*. Antaranya, ialah Imam Syafie yang berkata:<sup>14</sup>

*"Setiap apa yang aku kata, sedangkan hadith Nabi s.a.w., (menyebut) berbeza atau bertentangan dengan kataku, maka hadith Nabi s.a.w. lebih utama (diterima) maka jangan kamu bertaklid kepadaku."*

Imam Ahmad Ibn Hanbal juga mempunyai pendirian yang sama dengan Imam Syafie. Beliau melarang pengikut-pengikutnya dari bertaklid kepada beliau. Katanya:<sup>15</sup>

*"Jangan kamu bertaklidkan kepadaku, jangan bertaklid kepada Imam Malik, Imam Syafie, al-Awzaie, al-Thawri, bahkan ambillah dari mana sumber mereka itu ambil."*

<sup>13</sup> Majlis Agama Islam dan Adat Istiadat Melayu Perlis, *op.cit.*, hlm. 1-2.

<sup>14</sup> Ahmad Yusof Amin, *op.cit.*, hlm. 31-32. Dr. Wahbah al-Zuhayly, *op.cit.*, jid. 2, hlm. 1,130.

<sup>15</sup> Ahmad Yusof Amin, *op.cit.*, hlm. 32.

Dari petikan-petikan pendapat imam-imam mazhab yang dibawa oleh Ustaz Ahmad Yusof Amin itu, jelaslah bahawa imam-imam mazhab yang mempunyai ilmu pengetahuan yang luas menolak dan melarang pengikut-pengikutnya dari *bertaklid* kepada mereka. Jadi, berpandukan kepada pendapat imam-imam mazhab di atas dan kepada dalil-dalil lain lagi, Ahl al-Sunnah Perlis melarang *bertaklid* kepada mana-mana imam mazhab apabila pendapatnya tidak disokong oleh dalil-dalil yang kuat.

### c. Tumpuan Kepada Tauhid Aliran *Salafiyyah*

Akidah memang menduduki tempat yang terpenting dan paling asas dalam Islam. Lantaran itu dalam perjuangan tokoh-tokoh *Istah* dan *tajdid* di sepanjang zaman, persoalan akidah menjadi tumpuan utama dan istimewa sekali.

Bagi golongan Ahl al-Sunnah Perlis, didapati mereka juga amat mengambil berat tentang perkara-perkara ini. Pemikiran akidah mereka tidak sama dengan pemikiran umat Islam lain di Malaysia yang rata-rata mengikut akidah *Asy'ariyyah*.<sup>16</sup> Pengikut-pengikut Ahl al-Sunnah Perlis mendakwa bahawa mereka berpegang kepada akidah aliran *salafiyyah* sebagaimana yang dipegang oleh para sahabat, tabi'in dan tabi' al-tabi'in, juga seperti yang diajar oleh Ibn Taymiyyah dan Ibn al-Qayyim. Ia kemudiannya diperkembangkan oleh Muhammad Ibn Abd al-Wahhab. Kitab-kitab akidah karangan tokoh-tokoh *salafiyyah* termasuk karangan tokoh-tokoh di atas menjadi rujukan utama golongan Ahl al-Sunnah Perlis. Antaranya ialah kitab *al-Aqidah al-Wasitiyyah* karangan Ibn Taimiyyah, kitab *Syarh al-Aqidah al-Tahawiyyah* karangan Ibn Abd al-Izzi, kitab *Tawhid* karangan Muhammad Ibn al-Wahhab dan lain-lain kitab lagi.<sup>17</sup>

Kitab-kitab aliran *salafiyyah* yang dijadikan rujukan Ahl al-Sunnah Perlis didapati ada beberapa perkara yang berbeza dengan akidah *khalaf* atau akidah *Asya'irah*. Antaranya:

- Mengenai sifat-sifat Allah yang dipanggil sifat-sifat *khabariyyah* iaitu sifat-sifat yang pada zahirnya nampak ada persamaan dengan sifat-sifat makhluk seperti sifat *Yad*, *Wajh*, *Istiwa'*, *Nuzul* dan seumpamanya, golongan *salafiyyah* berpendapat bahawa semua sifat itu *diisbatkan* kepada Allah seperti yang *diisbarkan* dalam al-Quran dan hadith tanpa *dita'wil*, *tasybih*

<sup>16</sup>Golongan umat Islam yang bermazhab Syafie yang ramai di Malaysia pada umumnya berakidah *Asy'ariyyah* kerana terpengaruh dengan bawaan Akidah Abu Hassan al-Asy'ari, tetapi beliau sendiri di akhir hayatnya kembali kepada akidah Salaf, lihat kitab *al-Ibanah An-Usul al-Diyarah*, tahqiq Jamal Ibn Muhammad al-Ansari, al-Jami'ah al-Islamiyyah, Madinah, 1405H., hlm. 10.

<sup>17</sup>Abdul Rahman bin Haji Abdullah, *op.cit.*, hlm. 55.

dan *tamthil* juga tanpa *ta'til*, yakni tanpa memalingkan erti sifat-sifat itu yang sebenar kepada erti yang lain, juga tanpa menyama atau menyerupai sifat-sifat itu dengan sifat makhluk dan tanpa menafsi atau mengingkari sifat-sifat Allah yang disifatkan olehNya dan oleh Rasulullah s.a.w.<sup>18</sup> Ini berbeza dengan pandangan golongan *Asy'airah*. Mereka menta'wil semua sifat-sifat tersebut kepada erti yang lain seperti menta'wil sifat *Yad* kepada kekuasaan Allah, sifat *Wajh* kepada zatNya, *Istiwa'* kepada *Istila'* atau menguasai, *Nuzul dita'wil* kepada turunnya nikmat atau malaikat Allah dan begitulah seterusnya sifat-sifat yang lain lagi.<sup>19</sup> Golongan *Salafiyyah* menjelaskan bahawa cara beriman kepada sifat-sifat Allah ialah beriman dengan sifat-sifat sepetimana yang disifatkan oleh Allah S.W.T dalam al-Quran dan juga seperti yang dijelaskan oleh Nabi Muhammad s.a.w. di dalam hadithNya. Imam Ahmad Ibn Hanbal pernah menjelaskan tentang perkara ini. Katanya:<sup>20</sup>

"Jangan disifatkan Allah S.W.T kecuali dengan apa yang disifatkan oleh Allah dan RasulNya dan jangan melebihi apa yang disebut oleh al-Quran dan hadis RasulNya."

- b. Perkara kedua yang kelihatan ada perbezaan antara kitab akidah *Salafiyyah* dengan aliran *Asya'irah* ialah kitab-kitab *Salafiyyah* tidak menjelaskan mengenai sifat dua puluh sepetimana yang disebut dalam kitab-kitab akidah *khalaf Asy'irah*. Ia juga tidak membahagikan sifat Allah kepada empat bahagian seperti yang dilakukan oleh golongan *Asya'irah*. Kitab-kitab tersebut tidak ada menyebut bahawa setiap orang Islam wajib beriman dengan dua puluh sifat iaitu *Wujud, Qidam, Baqa', Mukhalafatuh li al-hawadith, Qiyamuh bi Nafsih, Wahdaniyyah, Qudrat, Iradat, 'Ilm, Hayat, Sama', Basar, Kalam, Kawnuh Qadiran, Kawnuh Muridan, Kawnuh Hayyan, Kawnuh Sami'an* dan *Kawnuh Mutaklliman*.

Sedangkan umumnya kitab-kitab akidah *khalaf Asy'irah* menyebut tentang sifat-sifat dua puluh seperti di atas dan lawan-lawannya sekali secara detail,<sup>21</sup> juga dibahagikan sifat itu kepada empat bahagian: Pertama sifat *Nafsiyyah*

<sup>18</sup>Lihat kitab-kitab seperti kitab "Hazibi 'Aqidah al-Salaf wa al-Khalaf", oleh Ibn Khalifah 'Alawi' u dan Kitab *al-Ibanah An Usul al-Diyah*, oleh Imam Abu Hassan al-Asy'ri dan lain-lain.

<sup>19</sup>Lihat Kitab Akidah Khalaf seperti Kitab *Tahqiq al-Maqam 'Ala Kifayah al-'Awam fi Ilm al-Kalam*. Matbaah Mustafa al-Babi al-Halabi, Mesir, 1341H., hlm. 37 dan lain-lain lagi.

<sup>20</sup>Dr. Ahmad Naim Yasin. *Kitab al-Iman Arkanuh Haqiqatuh*, Maktab al-Turath al-Islami, Kaherah. t.t.. hlm. 21.

<sup>21</sup>Lihat kitab-kitab akidah Khalaf seperti *al-Syarqawi 'Ala al-Hudhudī, 'Ala al-Sanusiyyah*, Maktabah Dar al-Ma'arif, Pulau Pinang, t.t., hlm. 45-93.

iaitu sifat *wujud*, kedua sifat *Salbiyyah* iaitu *Qidam, Baqa'*, *Mukhalafatuh Ta'ala li al-hawadith, Qiyamuh bi Nafsih* dan *Wahdaniyyah*. Ketiganya sifat *Ma'ani* iaitu *Qurdrat, Iradat, 'Ilm, Hayat, Sama', Basar* dan *Kalam*. Manakala bahagian keempat dipanggil sifat *Ma'nawiyyah* iaitu sifat-sifat *Kawnuh Qadiran, Kawnuh Muridan, Kawnuh 'Aliman, Kawnuh Hayyan, Kawnuh Sami'an* dan *Kawnuh Mutakalliman*.<sup>22</sup>

- c. Perbezaan ketiga ialah kitab-kitab akidah golongan *Salafiyyah* yang diterima oleh Ah al-Sunnah Perlis, membahagikan tauhid kepada tiga jenis; Pertama Tauhid *Rububiyyah*, kedua Tauhid *Asma* dan *sifat* ketiganya Tauhid *Uluhiyyah* atau Tauhid *Ubudiyyah*.<sup>23</sup> Pembahagian tauhid kepada tiga jenis seperti di atas telah diperkenalkan oleh Ibn Taymiyyah dan Ibn al-Qayyim yang kemudianya dikembangkan oleh Muhammad Ibn Abd al-Wahhab dan pengikutnya.<sup>24</sup>

Pembahagian sebegini di akhir-akhir ini telah diterima oleh ramai ulama seperti Dr. Abd al-Karim Zaydan dalam kitab “*Usul al-Da'wah*”nya,<sup>25</sup> Dr. Ahmad Naim Yassin dalam kitabnya “*Kitab al-Iman Arkanuh Haqiqatuh*”<sup>26</sup> dan lain-lain lagi.

### Cara Bertawassul

Satu lagi perkara penting yang ditekankan oleh Ahl al-Sunnah Perlis ialah mengenai cara *bertawassul*. Mereka berpendapat bahawa *bertawassul* atau memohon sesuatu melalui perantaraan memang dibolehkan kerana ianya diharuskan oleh syarak. Walau bagaimanapun mereka hanya mengharuskan *bertawassul* dengan tiga jenis sahaja; pertama dengan nama-nama dan sifat-sifat Allah *al-Husna*, kedua, dengan perantaraan amalan-amalan soleh yang dikerjakan, juga dengan iman kepada Allah dan Rasul-rasulNya seperti yang dilakukan oleh tiga orang umat yang terdahulu yang terperangkap di dalam gua. Setelah masing-masing *bertawassul* dengan amalan soleh yang dikerjakan dan dengan iman kepada Allah, akhirnya batu besar yang menutup pintu gua pun terbuka. Akhirnya

<sup>22</sup> *Ibid.* Dr. Muhammad Sa'id Ramadhan al-Buti, *Kubra al-Yaqiniyyat al-Kawniyyah*. Dar al-Fikr. 1397H., cet. 5, hlm. 115-145.

<sup>23</sup> Temuhabil dengan Haji Abdullah bin Haji Muhammad Ali di Markas al-Islah, Mata Air, pada 5.5.1995.

<sup>24</sup> Al-Syaikh Hafiz Ibn Ahmad al-Hakim, *Ma'arij al-Qabul fi Syarh Sullam al-Wusul Ila Ilm al-Usul fi al-Tawhid*, Dar al-Ifta wa al-Da'wah wa al-Irsyad, Riyadh, t.t., jld. I, hlm. 54.

<sup>25</sup> Maktabah al-Manar al-Islamiyyah, Baghdad, 1976M. - 1396H., cet. 2, hlm. 18-20.

<sup>26</sup> Maktabah al-Turath al-Islami, Kaherah, t.t., hlm. 9-23.

mereka bertiga dapat keluar dengan selamatnya daripada gua tersebut.<sup>27</sup> *Tawassul* ketiga dibolehkan oleh Ahl al-Sunnah Wa al-Jama'ah Perlis ialah dengan meminta dari orang soleh yang masih hidup supaya tolong berdoa kepada Allah agar Allah diperkenankan permohonannya.<sup>28</sup>

Adapun *bertawassul* dengan perantaraan roh si mati atau dengan *jah* dan *hak* atau pangkat seseorang yang telah mati seperti dengan roh para wali atau roh Syaikh tarikat, ianya ditolak oleh mereka. Ini kerana *tawassul* ini dianggap *tawassul bid'ah* yang tidak dilakukan oleh Rasulullah s.a.w. dan oleh *al-salaf al-salih*.<sup>29</sup>

Ini berbeza dengan pendapat setengah golongan seperti golongan sufi yang mengharuskan *bertawassul* jenis ini. Ini kerana orang mati dikatakan bahawa hanya badannya sahaja yang rosak dan hancur sedangkan rohnya tetap hidup dan tidak mati. Lantaran itu seseorang itu boleh *bertawassul* dengannya. Selain daripada itu, mereka juga menganggap bahawa *bertawassul* dengan si mati bukan bererti meminta daripada si mati tetapi mengharap dari rohnya supaya sama-sama memohon kepada Allah agar dimakbulkan permintaannya.<sup>30</sup> Pendapat ini ditolak oleh sesetengah ulama kerana dalilnya tidak begitu kuat.

Oleh kerana Ahl al-Sunnah Perlis bersikap sedemikian, ada sesetengah musuh mereka menganggap bahawa mereka menolak semua jenis *tawassul* secara total. Anggapan ini adalah satu anggapan yang salah. Apa yang sebenarnya ialah mereka hanya menolak *tawassul* yang bid'ah sahaja. Sikap mereka sedemikian adalah sama dengan sikap Ibn Taymiyyah dan Muhammad Ibn Abd al-Wahhab serta pengikut-pengikut mereka yang lain.

#### e. Menolak Tasawuf Dan Tarikat

Ahl al-Sunnah Perlis dengan tegas menolak semua bentuk aliran *tasawuf* dan tarikat yang diamalkan oleh setengah masyarakat Islam. Ia menganggapnya sebagai bid'ah. Mereka berpendapat bahawa di zaman Rasulullah s.a.w. dan di zaman *al-salaf al-salih* tidak ada sebarang aliran tarikat dan organisasi kerohanian. Bagi mereka untuk membentuk dan mendidik rohani agar menjadi

<sup>27</sup> Lihat Muhyiddin Abu Zakaria Yahya al-Nawawi, *Riyadhu al-Salihin*, Midan al-Jani al-Azhar, Mesir, t.t., hlm. 9-11.

<sup>28</sup> Temubual dengan Ustaz Noordin Ismail pada 8.5.1996 dan dengan Ustaz Dahlan bin Mohd Zain pada 7.5.1996.

<sup>29</sup> *Ibid.*, dan juga temubual dengan Ustaz Hj Salleh bin Hj Abdullah pada 9.6.1996.

<sup>30</sup> Zakaria @ Mahmud Daud, *Tawassul dan Tabarruk Mengikut Perspektif Islam*, Bahagian Hal Ehwal Islam, Kuala Lumpur, 1995, cet. 1, hlm. 56.

hampir dengan Allah dan supaya menjadi orang yang kuat bertakwa yang juga kuat beribadat kepadaNya, tidak perlu kepada *tasawuf* dan mengikut sesuatu aliran tariqat tertentu seperti tariqat *Ahmadiyyah*, *Naqsyabandiyah* dan sebagainya. Ia hanya tetapi cukup dengan mengikut cara Rasulullah s.a.w. dan para *al-salaf al-salih* seperti menunaikan kewajipan agama, menjauhi maksiat, selalu membaca wirid-wirid dan zikir yang diajar oleh Rasulullah, selalu membaca al-Quran, berselawat kepada Rasulullah s.a.w., menunaikan *Qiyam al-layl*, selalu menunai amalan-amalan sunat dan mengelak diri dari sifat-sifat tercela dan sebagainya.<sup>31</sup>

Mereka berpendapat bahawa kalau sekiranya cara tasawuf seperti di atas disuruh oleh Rasulullah s.a.w. tentulah ianya ada disebut di dalam kitab-kitab hadith yang begitu banyak. Walau bagaimanapun apa yang ada baginda hanya mengajar umatNya supaya sentiasa berzikir, beristighfar dan scumpamanya tidak melalui tariqat.<sup>32</sup>

#### f. Memerangi Perkara-perkara Syirik, Khurafat dan Bid'ah

Satu usaha penting yang dilakukan oleh golongan Ahl al-Sunnah Perlis ialah memerangi dan menghapus unsur-unsur syirik, khurafat dan bid'ah yang banyak diamalkan oleh masyarakat di sana, khususnya pada peringkat awal kelahiran gerakan itu.

Beberapa orang tokoh Ahl al-Sunnah yang ditemubual oleh penulis menyebut bahawa pada masa dahulu ada banyak kubur yang dikatakan keramat menjadi tumpuan masyarakat Perlis. Mereka datang memohon dan meminta sesuatu hajat, berniat dan bernazar, juga melakukan berbagai-bagai unsur syirik dan pemujaan kepadanya. Keramat-keramat tersebut ialah seperti Keramat Hj Muhammad Salleh Kampung Padang Pauh, Keramat Tok Shaykh Muda, Keramat Tok Lebai Salim, kedua-duanya di Kampung Mata Air. Keramat Tok Jernih di kampung Bukit Jernih, dan juga Keramat Tok Peduka. Dengan usaha dakwah yang berterusan dari tokoh-tokoh awal Ahl al-Sunnah Perlis bagi menghapuskan perkara-perkara tersebut, akhirnya unsur-unsur syirik dan kepercayaan karut tersebut dapat dihapuskan dan orang ramai terus meninggalkannya.<sup>33</sup>

<sup>31</sup>Temubual dengan Ustaz Muhammad Yusoff Amin pada 5.5.1995 dan Ustaz Hj Salleh bin Hj Abdullah pada 9.5.1996.

<sup>32</sup>*Ibid.*

<sup>33</sup>Temubual dengan Ustaz Hj Salleh bin Hj Abdullah pada 9.5.1996 dan Ustaz Dahlan Mohd Zain pada 7.5.1996.

Begitu juga perkara-perkara khurafat lain seperti pemujaan pantai dengan menyembelih kerbau putih, jamu hantu, jamu tok nenek,<sup>34</sup> kenduri tolak bala, melenggang perut bagi ibu yang mengandung anak sulung, merenjis tepung tawar dan menabur beras kunyit kepada kedua-dua pengantin dan sebagainya. Semua ini dapat dihapuskan sedikit demi sedikit.<sup>35</sup>

Selain dari itu terdapat juga perkara-perkara bid'ah yang banyak dilakukan oleh masyarakat di sana seperti talkin mayat selepas dikebumikan, tahlil arwah, tunggu kubur selama tujuh hari, keluarga si mati menyorok di bawah keranda sebanyak tiga kali di hadapan tangga sebelum mayat di bawa ke kubur, membaca *usali* sebelum takbir *al-Ihram* sewaktu hendak sembahyang dan lain-lain lagi dapat dihapuskan kesemuanya sedangkan di tempat-tempat lain di Malaysia perkara-perkara tersebut masih wujud dan diikuti oleh ramai masyarakat Islam. Jadi terhapusnya perkara-perkara khurafat, bid'ah dan seumpamanya di Perlis adalah hasil usaha gigih tokoh-tokoh Ahl al-Sunnah khususnya oleh tokoh-tokoh awal mereka.

#### g. Perkara-perkara Ibadat

Mengenai perkara ibadat, dikatakan mereka merujuk kepada al-Quran dan al-Sunnah juga kepada pendapat iman-imam mazhab yang berdalilkan kepada dalil-dalil yang kuat, walaupun pendapat itu menyalahi pendapat Imam Syafie. Oleh itu dalam perkara ibadat ini, didapati ada beberapa perkara atau amalan yang dilakukan oleh mereka berbeza dari yang dilakukan oleh pengikut bermazhab Syafie di negeri-negeri lain di Malaysia. Antaranya ialah mengenai cara menuai sembahyang lima waktu, sembahyang Jumaat, sembahyang terawih dan sebagainya. Sebagai contohnya, mereka membaca *bismillah* perlahan (tidak *jahr*) pada rakaat pertama dan kedua bagi sembahyang maghrib, Isyak dan Subuh. Mereka juga tidak membaca qunut pada sembahyang Subuh, tidak membaca wirid beramai-ramai selepas sembahyang fardu seperti yang dilakukan oleh ramai umat Islam di tempat-tempat lain di Malaysia. Masing-masing membaca wirid selepas sembahyang secara persendirian. Selain daripada itu, mereka juga berdoa secara bersendirian. Semasa menuai sembahyang Jumaat, mereka hanya mengadakan azan sekali sahaja dan seumpamanya.<sup>36</sup>

<sup>34</sup>Jamu tok nenek ialah mengadakan masakan makanan tertentu kemudian diberi makan kepada roh-roh datuk nenek yang telah mati dengan anggapan roh-roh tersebut putang ke rumah dan memakan makanan yang disediakan. Temubual dengan Ustaz Dahlani Mohd Zain pada 7.5.1996.

<sup>35</sup>Temubual dengan Ustaz Hj Salleh bin Hj Abdullah dan Ustaz Ramli bin Ahmad pada 9.5.1996.

<sup>36</sup>Temubual dengan tokoh-tokoh Ahl al-Sunnah Perlis seperti Ustaz Noordin bin Ismail, 8.5.1996. Hj. Salleh bin Hj Abdullah pada 9.5.1996.

Semasa menunaikan ibadat sembahyang terawih, mereka tidak membaca bacaan selingan di antara satu sembahyang dengan sembahyang yang lain. Mereka tidak membaca “فَصَلَّى اللَّهُ عَلَيْهِ وَسَلَّمَ سُبْحَانَ الرَّبِّ الْعَظِيمِ” dan “سَبَّحَ اللَّهُ أَكْثَرُ الْجَنَّةِ”. Mereka juga tidak berselawat beramai-ramai dengan kuat samada sekali atau tiga kali selepasnya. Bagi mereka, apabila selesai memberi salam, sembahyang pertama, mereka terus bangun menyambung sembahyang yang kedua, ketiga dan seterusnya. Ini berbeza dengan apa yang dilakukan oleh orang ramai di tempat-tempat lain di Malaysia.

## **Penutup**

Demikianlah beberapa ajaran yang diamalkan oleh golongan Ahl al-Sunnah Perlis yang pada umumnya banyak berbeza dengan apa yang diamalkan oleh ramai umat Islam di negeri-negeri lain di Malaysia, samada mengenai perkara akidah, cara bertawassul, menghapus unsur-unsur syirik, khurafat dan bid'ah atau hal-hal yang berhubung dengan cara menunaikan sembahyang dan lain-lain. Walaupun apa yang disebut di atas didapati banyak perbezaan dengan apa yang diamalkan oleh Ahl al-Sunnah di negeri-negeri lain, mereka tetap dianggap sebagai Ahl al-Sunnah kerana mereka masih berpegang dengan ajaran al-Quran, sunnah Rasulullah s.a.w., sunnah para sahabat dan pendapat ulama-ulama Ahl al-Sunnah yang lain yang disokong dengan dalil yang kuat.

